



Broj: 05-05-9791/17
Sarajevo, 25.04.2017.godine

SKUPŠTINA KANTONA SARAJEVO

- o v d j e -

n/r prof. Ana Babić, predsjedateljica

PREDMET: Dostava odgovora na zastupničko pitanje – zastupnik Amel Mekić

Zastupnik u Skupštini Kantona Sarajevo, Amel Mekić, na 26. Radnoj sjednici Skupštine Kantona Sarajevo, održanoj 22.03.2017. godine, u okviru tačke Dnevnog reda "Zastupnička pitanja, inicijative i odgovori", u skladu sa Poslovnikom Skupštine Kantona Sarajevo, postavio je zastupničko pitanje, kako slijedi:

"1. Zašto se ništa ne poduzme za nedozvoljeno plakatiranje na površinama koje nisu predviđene za to. Apelujem da se pooštre mjere i da se više ne dozvoli obilježavanje stubova za rasvjetu, zidova zgrada itd.

2. Svaki dan na obližnjim planinama Sarajeva niču nove nelegalne deponije, koje su najveće ruglo i koje ozbiljno narušavaju floru i faunu, kao i podzemne i površinske vode i zagađuju vazduh. Molim da mi se odgovori šta se konkretno poduzima po ovom pitanju?"

ODGOVOR:

1. Zabrana plakatiranja definisana je Zakonom o komunalnoj čistoći („Službene novine Kantona Sarajevo“ br. 14/16 i 41/16), čija je primjena u nadležnosti Ministarstva komunalne privrede i infrastrukture Kantona Sarajevo.

2. Održavanje čistoće i čišćenje komunalnog otpada sa javnih površina regulisano je, takođe Zakonom o komunalnoj čistoći Kantona. Javne površine u smislu ovog Zakona su, između ostalog "zelene površine", kao i površine za rekreaciju na otvorenom (izletišta), te zaštićena područja i zaštitni zeleni pojasevi infrastrukturnih sistema. Neposredni nadzor nad primjenom navedenog Zakona vrše komunalni redari, a inspeksijski nadzor Kantonalna komunalna inspekcija.

Planom za upravljanje otpadom Kantona Sarajevo za period 2015. - 2020. godina ("Službene novine Kantona Sarajevo", broj 29/15) definisane su aktivnosti na prevenciji stvaranja tzv. divljih deponija.

Konstantno formiranje divljih deponija jedan je od značajnih problema iz oblasti upravljanja otpadom u Kantonu Sarajevo. Divlje deponije u prirodnim područjima javljaju se uglavnom na mjestima gdje se nalaze izletišta i u mjestima gdje je slaba pokrivenost prikupljanja otpada.



Divlje deponije se najčešće javljaju na istim lokacijama kao posljedica navika neodgovornih stanovnika, ali i nekih pravnih lica koja koriste određene lokacije da bi zaobišli plaćanje pravilnog zbrinjavanja i tretmana otpada.

Dosadašnja praksa je pokazala, da se građevinski otpad često odlaže na slobodne površine na području Kantona Sarajevo, pri čemu nastaju nove divlje deponije, često locirane uz riječne tokove. Izvođači građevinskih radova nelegalno odlažu građevinski otpad i na Igmanu i Bjelašnici, stvarajući divlje deponije, na koje se odlažu i druge vrste otpada nepoznatog porijekla, koje nije moguće kontrolisati zbog veličine i nepristupačnosti terena.

Za onemogućavanje nelegalnog odlaganja građevinskog otpada potrebno je, zajedno sa ostalim mjerama, ukinuti mogućnost datu Zakonom o komunalnoj čistoći, da općine odobravaju lokacije za odlaganje inertnog materijala iz zemlje iz iskopa, te donijeti Pravilnik o upravljanju građevinskim otpadom, na osnovu Zakona o upravljanju otpadom Federacije Bosne i Hercegovine, što je zahtijevano više puta od Federalnog ministarstva okoliša i turizma, ali bez efekta.

Takođe, neophodno je izgraditi odlagalište inertnog otpada sa reciklažom građevinskog otpada u okviru Centra za upravljanje otpadom, za što je dosada osiguran Projekat, otkupljen dio zemljišta i realizovani određeni radovi iz sredstava predpristupnog fonda EC IPA 2011.

Za uklanjanje većine divljih deponija potrebna su značajna sredstva, kao i svakodnevni rad na onemogućavanju njihovog nastanka. S obzirom na značaj područja Igmana i Bjelašnice na kvalitet podzemnih voda, koje prihranjuju izvorište vode za piće u Sarajevskom polju, Ministarstvo prostornog uređenja, građenja i zaštite okoliša je proteklih godina više puta finansiralo čišćenje divljih deponija na Bjelašnici.

Nakon uklanjanja divljih deponija na izletištim na mjestu stalnog pojavljivanja otpada treba postaviti kontejnere za odlaganje otpada, te edukativne panoe čiji sadržaj ukazuje na negativan uticaj divljih deponija na okoliš, kao i onih koji proizvode otpad i ne vode računa o njegovom zbrinjavanju.

U slučaju nastajanja divljih deponija zbog neobuhvaćenosti pojedinih naselja organizovanim prikupljanjem i odvozom komunalnog otpada, neophodno je povećati pokrivenost uslugama odvoza otpada iz naselja u kojima je pokrivenost slaba. U područjima Kantona Sarajevo manje gustine naseljenosti, koja nisu pokrivena uslugama prikupljanja i odvoza otpada, postojeća situacija će se riješiti postavljanjem kontejnera veće zapremine koji će se prazniti po potrebi (pozivu), čime se smanjuju transportni troškovi.

Dakle, za sprečavanje nastajanja divljih deponija od izuzetnog je značaja dobra regulativa, jačanje ekološke svijesti, jačanje uloge općina, kontinuiran inspekcijski nadzor, te infrastruktura za adekvatno prikupljanje i zbrinjavanje svih vrsta čvrstog otpada.

S druge strane, situacija u zaštićenim prirodnim područjima (Spomenik prirode "Vrelo Bosne" i "Skakavac", te Zaštićeni pejzaž "Trebević" i "Bijambare" ukupne površine 2.930,90 ha) je potpuno drugačija, što govori u prilog činjenici, da je formalno – pravna i institucionalna zaštita prirodnih područja garant njihove uređenosti i kvalitetnog održavanja.

U tom kontekstu, Javna ustanova kao upravitelj prostorom obezbijeduje kontinuiran odvoz otpada sa pomenutih zaštićenih područja, s napomenom da na području SP "Vrelo Bosne" odvoz komunalnog otpada spada u redovni program KJKP "Rad" d.o.o. Sarajevo.

Svakako, ZP "Trebević" predstavlja dobar primjer kontrole i spriječavanja daljnjih nastajanja divljih deponija. Nakon donošenja Zakona o proglašenju ovog područja zaštićenim ("Službene novine Kantona Sarajevo" broj 15/14), očišćen je kompletan teren, postavljene korpe za otpad, te organizovan redovan odvoz. Sama spoznaja da na zaštićenim područjima, neko



(nadzornici/rendžeri) kontinuirano fizički boravi u prostoru psihološki djeluje na eventualne počiniocce zabranjenih radnji, te se na taj način suštinski mijenja odnos i odgovornost prema kompletnom stanju u području, pa i prema postupanju sa otpadom.

S poštovanjem,

MINISTAR

Čedomir Lukić, dipl.ing.arh.

Pripremile:

Mira Grgić, stručni savjetnik za upravljanje otpadom

*Amela Rokša, stručni savjetnik za planiranje,
upravljanje i korištenje prirodnih vrijednosti*

Kontrolisala:

Zijada Krvavac, pomoćnik ministra za zaštitu okoliša

Dostaviti:

- Naslov
- Vlada Kantona Sarajevo, ovdje (na znanje)
- Evidencija
- a/a



web: <http://mpz.ks.gov.ba>
e-mail: mpz@mpz.ks.gov.ba
Tel: + 387 (0) 33 562-029, Fax: + 387 (0) 33 562-031
Sarajevo, Reisa Džemaludina Čauševića 1

